

# Singaut i go long Memba bilong Madang

Dia Edita

Mi wanpela wokman bilong sios, insait long Amele eria long Madang. Mi wok 6-pela yia, 2001-2006, na mi oltaim harim planti pipel insait long Amele na Fuluma eria i komplem long Memba bilong Madang Mista Alois Kingsley. Long wanem em i no lukluk i kambek na stretim bikipela hevi ol i gat, em bagarap bilong bikipela rot i slip namel long 4-Mail Jansen i go pinis long Mawan, Transgogol. Dispela rot i save bringim planti sevis i go insait na kam ausait bilong planti samting pipel i nidim, edukesen, helt, wok didiman, wok bilong sios na gavman. Na ol mama i go kam long maket, painim liklik toea bilong lukautim famili.

Ol i gat askim olsem, mipela i gat Memba i makim mipela na i stap long Nesenel Gavman o? Sapos mipela i gat Memba, orait em wok bilong em long lukluk i kambek na stretim rot bilong mipela. Mi olsem sios wokman, mi stap namel long ol pipel na pilim pen na karim hevi wantaim ol. Mipela i painim kainkain rot, tasol strong bilong mipela i no inap. Olsem na mipela i putim singaut i kam long yu. Yu Memba, na wanem rot yu inap long helpim mipela em i stap long han bilong yu. Honarabol Memba, mi bilip olsem krai bilong ol pipel em i wanpela singaut God i givim i kam long yu, long mekim eksen bai bihain bilong laip, yu nogat tok. Yu i ken amamas.... Mi prea na lukluk i go long yu Memba, bilong kisim bekim i kam.

PR. PHILIP PORIMOIP  
ELC AMELE SEKET  
MADANG PROVINS

# Man dring bia na smuk em lusim laip

Dia Edita

Mi amamas long raitim ol stori bilong Buk Baibel. Yumi save go lotuim God long Sande na sabat, tasol yu no klia gut long Baibel na yu stap olsem aipas. Orait God bai givim yu skel bilong yu long las de, laka? Orait man o meri dring bia, na smuk na kaikai pik na kaikai buai, orait oltaim yu wokim koping bokis bilong yu bilong slip. So man bilong lotu tu, na ol gavman ofisa, loya na ministra ol i gat biknem tasol ol ting mi saveman na mi bikman. Tasol Buk Baibel toktok long-long man, so yu no pret long God bai lusim yu go long graun. Yu lukim Baibel ves tok nogat. God tambuim ol kaikai na dring bikos God i no laikim manmeri dai hariap.

Provises 20 i tok bia em nogut dring; Isaiah 28:7-8 tok bia em nogut long man; 1 Cran 3:16-17 tok God bai kilim yu husat bagarapim bodi; Isaiah 66:17 man kaikai pik bai dai; Wak Pris 11:7 Pik em deti animel; Matyu 8:28 Jesus rausim spirit nogut go indai long ol pik.

Em tasol tok bilong mi, na yu husat laik tumas kaikai na dring bia em pawa i stap long yu yet laka!

PETER P. NANA  
MT HAGEN  
WESTEN HAILANS PROVINS

# Raitim stret ol Baibel ves

Dia Edita

Gutpela tru long ritim pas i kam long ol kain kain man i rait long Wantok Niuspepa # 1646. Wanpela regula man em Peter Tilini bilong Lae, Morobe provins. Mi amamas long pas bilong em bin tok - Heven i nogat pik long kaikai.

Yes, bilong wanem tru na yu Peter, no bin raitim daun ol Baibel ves we ol i ken sapotim na strongim tok bilong yu? Taim yu no raitim daun, dispela i ken min olsem ating yu no wanpela trupela lotu man na yu i gat moa save long Buk Baibel. Ating yu traum tasol o yu mas wanpela nupela memba long SDA sios ha?

Olsem na yu no nap putim daun wanem Baibel ves yu toktok long en, o yu no klia bai yu tok wanem ya. Bihainim het tok bilong yu olsem bihain long heven, bai nogat pik, dok, snek, sipsip, kakaruk samting olsem. Yes, Peter mi bilip olsem poin tru long toktok em - Kaikai pik na sabat. Yu no ken traum long kolim olgeta kainkain abus, long wanem ol dispela arapela abus em i no as na poin we yumi save toktok na rait oltaim long Wantok pepa laka?

Mi laik yu stap stret long as toktok o topik yumi save toktok long en. No ken kalap nabaut na kolim ol arapela abus i kam

insait long poin bilong pik na sabat.

Yu tok olsem satan em papa bilong olgeta samting long graun? Bai mi mekim klia liklik olsem - satan em i god bilong dispela graun, yu lukim 2 Corin 4:4 i tokim long hia. Em i no papa bilong olgeta samting bilong dispela graun olsem yu bin tok, dispela long wanem em i no papa bilong mi long wanem mi kristen na God em papa bilong mi laka?

Taim yu tok olgeta samting bilong dispela graun, em yu min olgeta husat i tanim bel tru em satan i papa bilong ol tu? Olsem sampela taim tanim na tromoi tok pisin gut ah. Nogut yu konfusim na paulim tok i stap long Buk Tambu.

Jisas i tokim tu dispela hap tok i go long ol hetpris na em i tok: Yupela em pikinini bilong papa bilong yupela satan, o bai mi tok olsem satan em i papa bilong yupela long wanem bipo tru i nogat tok tru i stap long em, na taim em i mekim tok em save mekim tok giaman tasol long wanem em i as bilong tok giaman.

Olsem na Peter, sapos yu save long Baibel i gat dispela tok i stap, orait bai yu save olsem satan em i papa bilong olgeta manmeri long dispela graun husat ol i no bin tanim bel

tru na givim laip bilong ol i go long trupela God antap long heven. Ol i stap yet long sin pasin, orait bai yumi tok satan em papa bilong ol. Husat i tanim bel na kisim Jisas long laip bilong ol, God em i trupela papa bilong ol.

Yu askim tu olsem, God na Jisas save laikim dia samting o liklik samting? Pren, mi laik tokim yu olsem i no samting bilong yumi painimaut olsem God na Jisas i save laikim dia samting o liklik samting olsem yu bin askim long en laka?

Sapos mi ken bekim tru dispela askim bilong yu, bai mi tok olsem, (1) God i no tok long sait bilong abus olsem em i dia tumas olsem na em i no laik bai yu Peter kaikai pik, bikos em dia tumas. (2) God i no tokim kristen long yu mas kaikai tasol ol kaikai i no dia na lusim ol kaikai we em dia tumas laka? Wanem hap long Buk Tambu bilong yu i tokim yumi mas kaikai ol samting i no dia na ol dia samting yumi mas lusim? Mi save olsem yu wanpela man save laik tru long bihainim 10-pela Lo Buk Tambu i tok long en ya.

Tenk yu tumas.

MISTA P.I.  
LORENGAU  
MANUS PROVINS



**OLSEM WANEM:** Wara, graun na win i wankain na olgeta i mas i stap klin bai yumi ken stap gut na amamas. Hia long solwara long wof bilong Pot Mosbi we ol bikipela sip i save kam sua, pipia i pulap na mekim dispela hap wara i luk nogut. Dispela em we ol bikipela sip bilong kain kain hap long wol i save kam na wara olsem graun long hap i mas i nogat pipia i stap long en.

# Tenkyu long Wewak ANZ Beng

Dia Edita

Mi laik raitim dispela pas i go long Wantok Niuspepa na tok bikipela tenk yu i go long Praim Minista na Gren Sief Sir Michael Somare na olgeta bosman long opim dispela nupela benk long Wewak taun.

Ol pipel bilong Is Sepik provins i gat bikipela amamas na rispek long taim benk i open long 23/2/06 we planti ol ministra bilong Gavman na ol bikman olsem Oposisen Lida Petre O'Neil i stap tu long dispela taim. Tupela singsing grup

bilong Voeko/Koil ailan na tubuan bilong Murik Leiks i go pas long welkamim Gren Sif Sir Michael Somare.

Mi amamas long wokim protocol na pablik rileisins wok bilong Is Sepik Semba bilong Komes na mi mitim planti ol VIPS o visita

bilong dispela bikipela de. Mi laik tok tenk yu long Wewak Polis na olgeta husat i mekim dispela opening de i kamap naispela tru.

JOHN KRISOAKI  
WEWAK  
IS SEPIK PROVINS

# Sanapim Makam buai maket

Dia Edita

Komplem bilong mi i go long olgeta Gavman bilong Morobe provins olsem Gavman i mas sore long mipela ol Makam o buai growas bilong Morobe provins. Yupela i mas sanapim wanpela maket bilong buai o

buai maket bilong mipela long maketim buai bilong mipela. I nogat buai maket na mipela i save wokabout maket long buai. Tasol mipela i save abrusim lo na siti kansol i save holim mipela na senisim pes bilong mipela. Em tasol na husat i laik

sapotim o agensim, rait tasol long Wantok Niuspepa bilong yumi stret.

EFANG JONAH  
LAE  
MOROBÉ PROVINS